

新式標點

本足
胡文忠公全集

杜就田

胡文忠公全集卷二十四

長沙鄭敦謹
湘鄉曾國荃 編輯

謝恩給封典疏

七年十一月初六日

案准湖廣督臣王文春開咸豐七年十月初一日內閣奉上諭，官文奏巡撫捐餉，可否賞給封典等語。湖北巡撫胡林翼，久歷戎行，戰功卓著，上年克復武昌，業經賞給頭品頂戴，茲復在軍營捐廉助餉，著加恩封贈三代正一品，以昭優眷。該部知道。欽此。竊臣猥以非材，溘邀異數，領疆寄而莫勝肩任，與戎行而未奏膚功。前者秩晉頭銜，鵲濡滋愧；恩承心簡，蚊負時虞。茲以捐廉助餉，復蒙特予隆施，錫之寵命，金章燦爛，紫泥褒三代之封；玉軸輝煌，丹詔煥五花之彩。膺茲恩眷，倍切慙惶。臣母今年八十三歲，於十月十一日就養來鄂，當芝誥下頒之日，正板輿迎奉之時。錫類推仁，淪肌浹髓，臣惟有振肅軍威，兢兢職守，以期仰報高厚鴻慈於萬一。所有微臣感激下忱，謹恭摺具奏，叩謝天恩。

奏陳湖北裁汰鋪兵，分別有驛無驛，

改鋪司爲馬遞差遞疏

十一月初六日

胡文忠公全集 卷二十四 奏疏

竊準部咨議覆，山西省各廳州縣，向於公文驛遞外，另設鋪司兵，遞送文件，多係奸胥冒領，並未專設鋪兵，擬將通省鋪兵，全行裁汰，改爲馬遞，有驛各廳州縣，留工食十分之二，津貼捐馬工料之用。無驛各廳州縣，留工食十分之四，以資差役飯食之需。令卽查照原奏，各就地方情形，詳細體察辦理，以節糜費。而昭核實等因。當經行司查明議詳去後，茲據藩司馬秀儒、臬司羅遵殿、會查得州縣安設鋪司，原爲遞送尋常公文起見。近年楚省多未專設鋪兵，工食不無冒領，自應循照晉省奏案，一律裁汰，以節糜費而昭核實。請以奏咨奉到部文之日爲始，將湖北省有驛之江夏、武昌、咸甯、蒲圻、漢陽、漢川、黃陂、孝感、黃岡、蕪水、羅田、蘄州、黃梅、廣濟、鍾祥、京山、潛江、天門、安陸、雲夢、應城、應山、江陵、公安、松滋、宜都、襄陽、宜城、東湖、歸州、巴東、荊門等三十二州縣，原設鋪司，改爲馬遞。查照年額工食，酌留十分之二，津貼捐馬工料之用。無驛之嘉魚、興國、大冶、通山、通城、崇陽、陽新、陽麻、城黃、安陸、隨州、石首、監利、枝江、襄陽、南漳、光化、穀城、均州、鄖縣、鄖西、房縣、竹山、竹谿、保康、興山、長陽、長樂、鶴峯、恩施、宣恩、來鳳、咸豐、利川、建始、當陽、遠安等三十六州縣，原設鋪司，改派差遞。查照年額工食，酌留十分之四，以資差役飯食之需。嗣後各該州縣，遞送公文，責令隨到隨遞，倘有遲延，分別查參究治，庶於公事無誤，而經費亦歸實濟等情，具詳前來。臣等覆查無異，謹合詞恭摺覆奏，伏乞皇上聖鑒，飭部議覆施行。硃批兵部議奏，欽此。

請立清查交代限期疏

十一月初六日

竊查湖北自軍興以來，各州縣交代，多未結報。其失守處所，院司州縣文卷無存，並有道府檔案，一併燬失，各本員任內倉庫錢糧，正雜款項，或征存而捏爲民欠，或侵蝕而妄稱解支，種種弊竇，清查匪易。臣等於克復省城後，卽設立總局，揀派司道大員，將通省州縣交代未結報者，逐任逐款，澈底清查，以期水落石出。維時各屬土匪未靖，嗣因皖匪上犯，蕪黃辦理防堵，兼以本任之員陣亡殉難，參革病故，節次行提家屬丁書，未能立限查辦。現在楚境肅清，大軍均指江皖，不能不代江皖而力爲籌畫，惟是新餉積欠，需用浩繁，州縣應解之款，如有侵蝕，亟應追繳，未便再任延宕。查湖北自道光二十八年清查之後，迄今已逾八年之久，州縣有六七任未清交代者，視國帑如私囊，法紀蕩然，漫無考成。惟總局統司稽核，頭緒繁多，似應稍寬時日，俾得詳細勾稽，以昭慎重。茲擬自咸豐八年正月初一日起，限至九年六月三十日止，飭令總局司道督同局員，將通省州縣交代，未經結報，起數查明，會否解支，有無虧短，一律結算完竣，不準逾違。其州縣應造清冊，統限本年封印前齊到。如有藉詞延宕，由臣等隨時撤調來省，分別查參辦理。其清查章程，俟起限後辦有端倪，再行開單，恭呈御覽。如此明定期限，庶交代不致再延，而款項可期有著。是否有當，謹合詞恭摺具奏，硃批該部議奏，欽此。

遵旨查覆沙市釐金情形疏

十一月初九日

咸豐七年九月十六日，準軍機大臣字寄。咸豐七年九月初八日，奉上諭，有人奏湖北省設局抽取釐金，以荊州府屬之沙市鎮爲精華。前此地方官吏，於各行店貨物，書得制錢一千者，抽取十二文，零星鋪戶，分上中下三項，每月或認出制錢六十串，至二十串不等。本年六七月間，又議加增前次收取十二文者，竟加至三十六文。該商等以所取過多，求減不允，幾至歇業罷市。此次釐金，多係官紳侵蝕，歸軍餉者無幾。此外如荊門州屬之沙洋、襄陽府屬之樊城、老河口、沔陽州屬之新隄等處，皆有分設抽釐各局，亦未必能盡歸公用，請飭一併酌量覈實辦理等語。各省設局，抽取釐金，原出於萬不得已。若任意加增，徒飽官紳私囊，必至有礙民生，無益國計。著官文、胡林翼、揀派督員，督同地方紳士，妥爲經理，毋任不肖官吏，假公濟私，務於軍餉有裨，不致擾累閭閻，是爲至要。原片著抄給閱看，將此由五百里諭令知之。欽此。等因，寄信前來。臣等查湖北自軍興以來，餉項支絀，咸豐五年十一月，準戶部咨抄江蘇泰州仙女廟等處，抽釐章程，行令遵照辦理。當擇湖北向稱繁盛之州縣，飭令地方官，因地制宜，設局抽取。試辦之初，由臣官文、路經沙洋查看情形，約計貨物可售制錢一千者，酌定抽釐金十二文。商情頗爲悅服，曾經通行在案。其時武漢未復，商

買不通，辦理迄無成效。隨查有應升知縣伍經手漢陽縣釐金，帳目延不造報解繳。又在有代理漢川縣知縣候補縣丞曹私設釐金小局四十七處，竭澤而漁。經臣胡林翼於上年甄別案內，奏參革職。本年又在有署漢川縣知縣張沙洋州同陳委辦釐金，多不核實，立予撤任，以示懲儆。各在案。當將各屬抽釐事務，另延公正紳士，實心承辦。不許州縣丁胥經手，以杜弊端。並於省城設立總局，專派道府大員，嚴密查察。所有各局抽收釐金，隨收隨解。總糧臺交收。接濟軍餉。按月造具收支總數清冊，通報督撫暨總局查考。自省城克復半載以來，漸有起色。於兵餉不無小補。此湖北辦理釐金之實在情形也。查荊州府屬之沙市鎮，向稱繁盛。兼之未被賊擾，衆商畢集。然釐金亦止按制錢一千元，抽釐十二文。以示公允而免藉口。其零星貨物，由行戶發賣者，若估計抽釐殊形繁瑣，因就鋪面之大小，銷貨之多寡，每月分別酌提釐金錢三四千，一二十千文不等。通計亦以制錢一千元，抽取十二文爲準。商民並無擾累。惟在沙市貨物，多係來自四川，自蜀至楚，宜昌府爲必由之路。自宜昌至沙市，中間三百餘里，途徑分歧，陸路可通。荊門安陸各州縣水路則可直達湖南，節節偷越，防不勝防。他處之偷漏日多，則沙市之釐金日減。本年五月，經署宜昌府知府劉步駟請於上游之平善壩總扼其要，設局抽釐，係爲嚴杜偷漏起見。臣胡林翼隨卽通飭下游各局，凡由川入楚之貨，經商人於平善壩完釐，給有照票者，聽其販往他處售賣，下游各局驗票放行，不

得重復抽釐，以示體卹。此準去後，卽有奸商從中煽惑，據荆宜施道莊受祺稟，據沙市鎮各商公呈，求免抽釐。臣等以宜昌相距沙市遠在數百餘里，平善壩抽釐，與沙市絕不關涉。該商等何得藉詞違抗。當卽剴切批示，並飭查拏布散浮言之人，從重究治。復於六月三十日，據莊受祺等稟，據沙市商販馬玉堂等稟稱，情願於沙市加倍完納釐金，請撤平善壩釐局等語。臣等以川貨入楚，販載不止一人，銷售不止一處，何以沙市客商情願加倍，代爲完納。事不近情，顯有奸詐。又經逐條駁斥，嚴禁不准加增在案。是該商等始則意圖抗違，繼以自願加倍完釐，誣官吏以聳聽，設使墮其奸計，在商人陰挾阻撓軍餉之實，陽爲自願加釐之名。經臣等駁斥不准，俯首無辭。市儈之詭譎居心，大可概見。現在平善壩已開局抽釐，沙市鎮亦相安無事。此辦理沙市釐金，並不準其加增，又實無加至三十六文，歇業罷市之情形也。此外如荊門州屬之沙洋、襄陽府屬之樊城、老河口、沔陽州屬之新隄、漢陽縣屬之蔡店、武昌縣屬之樊口、廣濟縣屬之武穴等處，均照每千抽釐十二文。先後舉行。商民安業。釐金專充兵餉，他事不得擅支，實無纖毫弊竇。伏查抽釐助餉，原爲軍需省分，萬不獲已之舉，益餉尙恐其病民，况累商而歸於中飽。現在一概責成公正紳耆管理，不經胥役之手，又有總局大員隨時稽查。層層鈐束，假公濟私之弊，似可無虞。除仍嚴切訪查外，所有辦理沙市釐金緣由，謹合詞恭摺覆奏。

奏陳鄂省員缺虛懸請不拘文法資

格揀員調補疏

十一月初九日

竊查湖北軍興以來吏治廢弛已非一日各郡州縣被擾較廣。承倅牧令或陣亡殉難或參劾病故中間院司迭更道途梗塞每一缺出未能隨時詳報均由該管道府暫委代理兼以文卷燬失並不能查其因何出缺及出缺日期年復一年無從清理現在懸缺既多為時又久大兵之後望治孔殷必得賢有司休養生息寬猛兼施方與國計民生兩有裨益然或人地相宜而格於定例一經遷就位置稍失其當即施展莫稱其才臣胡林翼於上年敬陳兵政吏治之要請飭部臣暫勿拘臣文法資格容臣分別委署以試驗而期實效奏蒙俞允在案。臣等即於接見屬員時詳加察訪於各員優劣一一存記復同司道商推再四實無合例可補之員而員缺空曠或五六年三四年不等若不變通辦理轉恐貽誤地方查例載知縣以上官員題補缺出升調兼行聽候督撫酌量具題此外應行調補之缺均令該督撫照例於屬員內對品改調等語至簡缺請補例有輪班補用又何項缺出以何項人員擬補之文立法至周至善原不容絲毫紊越然此特為無事時言之若湖北地方迭經兵燹通計承倅州縣懸缺至二十九員之多歷時至五六年之久現在揀發即用大挑軍功保升各員到省多在出缺之後實缺人員除新選外僅存二三員而歷俸三年者尤少此

不能不斟酌變通擬難照例之實在情形也。茲查可調可補之員與所懸之缺各相當者武昌府同知係升調要缺自咸豐四年本任姜國祺殉難後尚未補員查有候補同知劉際精明老練堪以補授。惟出缺在前與例不符。漢陽府同知係升調要缺自咸豐三年本任張曜孫革職後尚未補員查有揀發同知何元愷醴謹和平堪以補授。惟到省在後與例不符。襄陽府同知係升調要缺自咸豐四年本任崇綬殉難尚未補員查有儘先補用同知現署江夏縣事文濟美才具優長堪以補授。惟出缺在前與例不符。安陸府同知係中缺本任王金猷於何年因何事開缺無案可稽查有知府銜補用同知直隸州知州吳嗣仲才具明練堪以補授。惟出缺在前與例不符。荊門直隸州係衝繁疲難要缺咸豐三年九月本任李樞陣亡後尚未揀補查有不論繁簡遇缺即補同知署應城縣事黃昌輔守潔才優堪以借補。惟以同知借補直隸州與例不符。江夏縣係通省首邑要缺咸豐三年本任鮑光霽革職開缺尚未揀補查通城縣知縣現署襄陽縣知縣韓體震才守兼優堪以調補。惟到省在後本任歷俸未滿與例不符。孝感縣係兼四要缺本任知縣李樞咸豐三年升荊門州開缺尚未揀補查有開復知縣湯一德才具穩練堪以揀補。惟出缺在前開復在後與例不符。黃陂縣係請調要缺本任呂錫麟殉難開缺尚未揀補查有不論繁簡遇缺先用知縣孫繼祖辦事勤幹堪以補授。惟出缺在前保升在後與例不符。黃岡縣係請調繁缺咸豐三年本任沈熙

麟失守開缺，尙未揀補。查有候補知縣薛元啓，強幹有爲，堪以補授。惟出缺在前，與例不符。蘄水縣係請調要缺，咸豐三年本任劉榮因案革職，開缺尙未揀補。查有宜都縣知縣易光蕙，精明強幹，堪以調補。惟出缺在前，且本任歷俸未滿三年，與例不符。蘄州係請調要缺，本任潘克溥，咸豐六年告病開缺，查有補用知府候補知州彭應鯉，幹練誠實，堪以補授。惟保升尙未送部引見，與例不符。鍾祥縣係請調繁缺，本任馬晉圖，請補漢陽縣缺，查有京山縣知縣裴紹箕，動幹有爲，堪以調補。惟歷俸未滿三年，與例不符。天門縣係請調要缺，本任饒拱辰，咸豐三年升任武黃同知，開缺尙未調補。查有鄖縣知縣龍雲，穩練安詳，堪以調補。惟到任在後，與例不符。襄陽縣係請調要缺，咸豐三年本任熊寶書，告病開缺，尙未補員。查有揀發知縣升用同知直隸州知州黃秩林，辦事結實，堪以補授。惟到省在後，與例不符。襄陽縣係請調要缺，本任陳子飭，咸豐四年病故出缺，尙未補員。查有補用知縣賀懋樞，質直勤明，堪以補授。惟保留在後，尙未引見，與例不符。均州係歸選簡缺，本任殷序之，咸豐五年八月病故出缺，聲請外補。查有補用知州熊登瀛，樸實練達，堪以補授。惟保升在後，與例不符。南漳縣係無字簡缺。本任勞宗煥，咸豐四年二月病故出缺，尙未補員。查有揀發知縣鄭慶華，質直謹飭，堪以補授。惟出缺在前，與例不符。江陵縣係衝繁疲難，請調要缺。本任陳均遠，咸豐四年升任開缺，尙未調補。查有揀發知縣吉臨，明白諳練，堪以補授。惟到省在後，與例

不符。松滋縣係簡缺，本任劉鴻庚，在漢陽縣任內殉難，尙未補員。查有大挑知縣宋文觀，明白穩當，堪以補授。惟試用年限未滿，與例不符。枝江縣係簡缺，本任朱啓鴻，咸豐二年告病開缺，尙未補員。查有同知銜揀發知縣朱錫綬，心地精細，堪以補授。惟到任在後，與例不符。監利縣係繁疲難請調要缺。本任李嘉瑞，咸豐二年告病開缺，尙未補員。查有同知銜升用知縣京山縣縣丞王震，精審有才，堪以升補。所有京山縣縣丞員缺，應另咨開缺，叩留外補。石首縣係簡缺，本任黃光彬，告病開缺，接準部咨，尙未補員。查有大挑知縣袁秉亮，才情奮發，堪以補授。惟到省在後，試用年限未滿，與例不符。長陽縣簡缺，本任舒文，何年何事開缺，無案可稽。查有升用同知，直隸州揀發知縣景匯，心地誠樸，堪以補授。惟到省在後，與例不符。長樂縣簡缺，本任李煥春，何年告病開缺，無案可稽。查有大挑知縣應鑾階，樸實有爲，堪以補授。惟試用年限未滿，與例不符。來鳳縣係簡缺。本任吳宗邦，咸豐三年病故，曾否題請開缺，無案可稽。查有候補知縣王頌三，辦事明決，堪以補授。惟與輪補班次不符。宣恩縣簡缺，本任姜國祺，升任武昌府同知，尙未補員。查有同知銜候補知縣陳文照，年刀富強，堪以補授。惟出缺在前，與例不符。保康縣係簡缺，本任馬德超，何年何事開缺，無案可稽。查有開復知縣方兆科，辦事實心，堪以補授。惟到省在後，與例不符。竹谿縣係題缺，本任賀榮，改歸按經歷班開缺。查有揀發知縣德廉，才具通達，堪以補授。惟到省在後，與例不符。鶴峯州係

簡缺，本任余繼桂，咸豐六年病故，開缺，尙未補員。查有補用知州梁元珠，勤幹任事，堪以補授。惟與輪補班次不符。以上各缺所擬各員，或現經委署缺分，適當其人，或才略較優，量移方盡其用人地，均屬相宜。惟於調補請補之例，多有不符。但員缺久懸，地方緊要，在朝廷設官分職，有一缺即有一員在。臣等器使因材，補一官當收一效。且一經補定，此後循序輪流，即可輪班接補。至各員調補之後，仍當隨事隨時察看甄別。臣等固不敢存私意於前，尤不敢設成見於後。此外候補人員，尙有班次在，現擬各員之前，及前後相等者，或人地未宜，或才力未逮，應再另行察看辦理。據藩司馬秀儒、臬司羅邇殿會詳前來。臣等公同覆核，謹將各該員調補請補，與例不符，及湖北現在難以照例辦理各緣由，據實陳明。伏乞皇上天恩，飭部核議。如蒙俞允，各員中有應送部引見之員，俟楚省軍務告竣，再行照例給咨。除各員履歷，另繕清單咨部查核。臣等爲員缺相需，因地擇人起見，是否有當，謹合詞具奏，伏祈聖鑒訓示。硃批吏部議奏，欽此。

奏陳收過鄰省協餉，及本省收支銀

米總數疏

十二月二十七日

竊臣自咸豐五年，由江西率師援鄂，糧臺分設數處，輻輳牽涉之款，頭緒繁多。經臣奏請展至本年六月造報。隨據糧臺司道造具收支各款總數清冊。時因皖匪上犯楚邊，臣即馳赴蕪黃剿

辦，不及親加核對。復請加展三箇月，俟楚境肅清，悉心稽核。荷蒙俞允。臣於九月初旬，由九江回省。隨將該司道等呈送總冊，詳加核對。聞有錯漏，往返覈正。統計南岸軍需，自咸豐五年正月，起至六年六月止，其先後收鄰省協濟，及本省地丁漕糧、鹽課、牙釐、捐輸等項，銀一百三十五萬七千九百一十四兩七錢六釐。共收米一萬一千七百八十六石八斗三升二合三勺。共支過馬步水師官弁兵勇口糧，並採辦製造軍裝器械，運解人夫船隻，開濠築壘，卹賞雜支等項，銀一百三十五萬三千九百八兩四錢一分。共支米一萬四千九百四十四石四斗七升一合。據布政司馬秀儒、道員厲雲官造冊請奏前來。臣查報銷款目，以收支總數爲大綱。該司道等所報收過鄰省協撥，及本省地丁漕糧、鹽課、牙釐、捐輸等項，及支過馬步水師官弁兵勇口糧，並採辦製造軍裝器械，運解人夫船隻，開濠築壘，卹賞雜支銀米各款，臣覆加查核，均屬相符。除將清冊咨部，並飭該司道等將支用各款，逐細勾稽，次第報銷，並將續行收支各款，趕緊造報外，謹將咸豐五年正月，起至六年六月止，截清收支總數緣由，恭摺具奏，伏乞皇上聖鑒訓示。再此案續請展限，復因籤查更正，以致奏報稽遲，合併陳明。

奏陳楚師分剿江皖大勝疏

十一月二十七日督發

竊臣官文等，前因楊載福水師乘勝下剿，直達東流銅陵後，

仍汭流而上，回駐彭湖一帶。偵知江西逆渠偽國宗章志俊等，由浮梁建德鄱陽等縣，糾集大股逆黨二萬數千，復窺湖口，圖援九江。而皖賊亦復分路上竄，疊經咨飭水陸各軍，嚴密戒備。一面由李續賓九江營內，抽撥陸勇五千人，派候選道李續宜統領。於十月十三日，拔營馳往湖口，會合楊載福彭玉麟水師，迎頭剿辦。十六日，李續宜渡湖駐營三家市，率領兵勇，登營前之蠓虬山等處，相度地勢，見該山數十里外，煙焰張天，賊旂如林。當與同知直隸州金國琛，革職知縣擬罪新疆之王揆一，熟商進剿之策。十九日卯刻，李續宜派副將周寬世，率湘後等營，從中路馬影橋，繞出賊後。又派都司黃澤遠，率新後等營，從右路進扼滂家渡，均各捲旂息鼓而行。惟李續宜率副中副右等營，張旂擂鼓，從中路進，駐蠓虬山。我軍布置甫定，賊由左路迎拒者八九千人。周寬世等四營從山谷陡出截擊，趙克彰等四營伏兵，又分路夾剿，斃賊二千數百名。其前路西洋橋排龍口，右路江橋二賢寺等處，賊衆蜂擁而來，約萬餘人，不知左路已敗，猶併力趨蠓虬山，勢甚兇悍。我軍鎗礮火箭齊發，繼以刀矛，連斃悍賊多名。又以水師礮船轟擊其前，黃澤遠一軍橫截其右。斃賊又千數百，追殺十餘里，屍橫遍野，生擒二百餘名，奪獲旂械無算。連日搜斬餘匪六百餘人。而探知鄱陽新到援賊數千，合敗黨又及二萬，屯聚於彭澤之泰坪。關二十六日，李續宜拔營馳往駐磨盤山察看。該逆依山傍河築

壘二十六座。二十八日，李續宜商令王揆一等，分派各營，以中左兩路設伏接應，而以右路正兵誘敵示弱。賊果欺我軍隊伍懈弛，直前猛撲。將近中左兩路，伏勇齊起，併力奮擊，賊衆大敗。兵勇乘勝，破其卡壘，四面焚殺，煙火迷天。斃賊共五千餘名，沿途追殺，又六七百。其跪求乞命及逃匿林谷者，每營生擒或八九十人，或百餘名，內有鍾謙盛等四十三人，皆爲先鋒指揮檢點之類。均經訊明，分別斬梟。奪獲大小僞印六十餘顆，旂幟馬匹無算。此十月十九二十八等日，我軍剿退湖口彭澤大股逆匪，連獲勝仗之實在情形也。臣都興阿因皖逆屢圖上竄，刻刻隄防。先經飭派巴依爾呼蘭馬隊，馳赴宿松。又派統帶訓營步隊之督糧道唐訓方，駐陳德國以固蘄州門戶，而令翼長多隆阿，副將鮑超，專剿太湖一路。十一月十五日午刻，宿松股匪三四千人，由彌陀鎮直撲蘄州邊界。唐訓方會合馬隊，奮力衝擊，殺賊數百，賊始敗退。而是日太湖逆衆，麇聚於楓香驛仙田鋪紫方河界水河等處，築壘十三座，山林左右伏賊尤多，意在竄撲二郎河官營。多隆阿於十六日黎明，派石清吉等三營步隊，以喀爾庫馬隊繼之。鮑超率丁長春等四營步隊，以西林布馬隊繼之。又派鄭陽和祿昌等馬步各隊，分路迎剿，賊殊死戰。多隆阿西林布祿昌各分軍，由小路抄出賊後，縱馬馳驟，賊勢披靡。鮑超等即乘勝縱燒賊壘，兵勇分投截擊，共斃賊三千餘名，敗賊沿山繞谷，我軍且追且殺，沿途又斃賊千餘。內有黃衣騎馬賊五六十名，生擒一百四十餘名，奪獲騾馬六十餘

匹，大小鎗礮三百餘件，旂械無數，我軍間有傷亡，是日收隊，已二更矣。由小路分竄陳德園之賊，被唐訓方列陣截擊，斬殺殆盡。而續探報，金陵城內出賊四萬餘人，由太平府蕪湖過江，至安慶。逆目係僞一百零二檢點周賊，僞右丞相唐賊等。因值太湖股匪連日敗挫，聲言會合，再圖上犯等語。核與唐訓方生擒賊供相同。臣都與阿，已飭各軍慎密籌防，靜以制動。此又連日剿退宿松太湖逆匪，大獲勝仗之實在情形也。據李續賓等先後稟報前來，臣等查該逆憤湖口之敗，九江之困，糾集大股，蓄志上犯。仰賴天威，將士用命，連戰皆捷。江皖各軍，殺賊二萬數千，解散黨羽，亦復不少。實足大快人心。刻下湖口彭澤都昌各屬，一律肅清，惟宿太各路，復有金陵賊援，至仍當實力防剿，並飭催速將九江內困之賊悉數殄滅。靡有孑遺，以期專意東征，仰紓宸廑。除此次出力人員，並受傷陣亡弁勇，查明分別具奏，祇候恩施外，謹將楚北各軍分剿江皖連獲大勝情形，繕摺由驛六百里馳奏。

再此次湖口彭澤數大戰力，遇兇鋒，皆由將士非常用命，於東征全局，大有裨益。所有戰功尤著之，遇缺副將翼勇巴圖魯周寬世，擬請賞加總兵銜。遇缺副將趙克彰，擬請賞加勇號。又儘先參將郎陽右營游擊李續燾，擬請免補參將，以副將遇缺升補。參將銜儘先補用游擊朱希廣，擬請免補游擊，以參將儘先補用，並請賞加副將銜。郎陽城守營藍翎游擊劉連升，擬請以參將儘先補用，並請賞換花翎。儘先補用都司謝永祜，升補都司黃澤遠，均

請免補都司，以游擊儘先補用。又儘先補用藍翎守備張復泰，擬請免補守備，以都司儘先補用，並請賞換花翎。又藍翎守備銜千總李運絡，請免補千總，以守備儘先補用，並請賞換花翎。加都司銜，又同知銜儘先補用知縣梁作楫，請賞戴花翎。選用從九品萬遠培，請免選本班，以州判儘先選用，並請賞加五品銜。均出自天恩，俾從征將士，倍深感奮。此外在事出力弁勇，並進剿宿太各軍出力人員，仍由臣等查明，擇尤酌保，籲懇恩施，謹附片陳明。

上諭官文等奏：楚軍分剿江皖賊匪，連獲大勝一摺，並先行保舉出力各員等語。此次江皖各軍，殺賊二萬數千名，解散賊黨不少。湖口彭澤都昌各屬，一律肅清。著官文等激勵將弁，將宿太各路援賊，實力防剿，並速克九江，殲除逆匪，毋再遲延。此次尤為出力人員，自應先加獎勵。遇缺副將周寬世，著賞加總兵銜。遇缺副將趙克彰，著賞給摺勇巴圖魯名號。儘先參將郎陽右營遊擊李續燾，著免補參將，以副將遇缺升補。參將銜儘先補用游擊朱希廣，著免補游擊，以參將儘先補用，並賞加副將銜。郎陽城守營藍翎游擊劉連升，著以參將儘先補用，並賞換花翎。儘先補用都司謝永祜，升補都司黃澤遠，均著免補都司，以游擊儘先補用。儘先補用藍翎守備張復泰，著免補守備，以都司儘先補用，並賞換花翎。藍翎守備銜千總李運絡，著免補千總，以守備儘先補用，賞換花翎，並賞加都司銜。同知銜儘先補用知縣梁作楫，著賞戴花翎。從九品萬遠培，著免選本班，以州判儘先選用，並賞加五品銜。

以示鼓勵。其餘在事各員弁等，仍著官文等擇尤保奏。陣亡弁勇，查明請卹。該部知道。欽此。（月日接奉）

遵旨籌議水師迅速東征疏

十二月初六日督發

本年十一月三十日，承準軍機大臣字寄。咸豐七年十一月二十三日，奉上諭。昨據德興阿和春先後奏報。本月十二日，克復瓜洲鎮江，已諭令該大臣等乘勝進攻。惟該逆挺而走險，若從金陵竄出，必奔安慶，而上游九江尚未克復。楊載福一軍，勢難遽行東下。該提督前已駛過安慶，攻燬賊營數處。其用兵謀略，實有過人之處。著官文等即傳旨，令楊載福速攻九江，毋再遲緩。一經得手，即乘勝將沿江賊壘掃除，直抵安慶。都興阿督帶陸兵進剿宿太楊載福已離楚境以後，軍務情形，即著該提督自行奏報。將此由六百里諭知官文都興阿胡林翼，並傳諭楊載福知之等因。欽此。仰見聖謨廣運，欽感難名。臣等在九江情形，自湖口克復之後，賊益窮蹙。十月十九二十八等日，復經候選道李續宜擊退賊援。該匪屢思走險，而重濠不能飛越，均被我兵截回。檻獸釜魚，聚殲可待。廣東惠潮嘉道彭玉麟，所管內湖水師，以八營防剿江西省河贛河。以二營留駐湖口，與楊載福李續宜水陸攻擊。是楊載福一軍，似難全行東下。惟鎮江瓜洲既經克復，又未便以潯城未下，坐失事機。臣等竊念該逆挺而走險，若從金陵竄出，恐其偷渡江

北，奔竄安慶。現已咨商楊載福，趕緊料理，能否分兵先行下駛，使逆匪不致偷渡北岸。一面由臣等籌畫銀錢米糧，軍裝火器，必須辦足兩月之用，載以俱行。仍以武昌為糧臺根本，以九江為老營根本，則征軍無返顧之虞。長江有建瓴之勢，至水師利用在乎飄忽無定，未可膠滯一隅。此次水師東下，應於有賊之處，隨機離剿，無賊之處，奮迅往來，倏忽千里，使逆賊不能測我兵機，窺我江路。則江皖陸師攻剿，必易得手。楊載福用兵，謀略久在聖明洞鑒之中。其審機觀變，分合進止，全在該提督之隨機決斷。茲蒙皇上聖知如神，破格畀任，準楊載福自行奏報，俾得盡其所長，無所牽制。必能殫竭血誠，肅清江面。除飭水陸各軍力攻九江，迅期克復，並俟楊載福咨商確情，另行具報外，所有現在籌辦兵餉軍火，一面咨商福建提臣楊載福，能否先期料理東下各緣，由謹合詞恭摺具奏。

再臣等查內湖水師道員彭玉麟，九月初旬，與外江水師楊載福訂期會合，攻奪湖口。據稟口糧欠發太久，自應不分畛域，量為協濟。當飭武昌糧臺籌款，陸續協濟。茲據糧臺稟報，除前次協濟江西餉銀業經奏報外，自九月十七日起，至十一月二十八日止，共解銀三萬七千兩，解錢三萬三千五百串。又安徽藩司李孟羣征剿六安匪徒，冬寒歲莫，餉項支絀，業由武昌糧臺籌給銀八千兩，於十二月初六日，委員解交六安軍營。又上年自鄂派援江西之湘寶等營，除疊次籌解銀八萬九千兩，錢五千串，業經先後

奏明外，該營在吉安剿賊，餉項支絀，正當石逆窺伺臨吉，大股上犯之際，未敢漠視。現於武昌糧臺籌給銀一萬兩，於十二月初六日，委員由湖南解交，除分咨江西安徽撫臣，札飭各營造報外，理合附片陳奏。

卷二十五

請旨革提違章徵收之知州疏

七年十二月初六日

竊查湖北漕務積弊，將及百年。臣於本年十月十四日，將漕務積弊已久，亟應革除冗費，減定漕章各情形，密摺奏開在案。旋與司道督同武漢兩府，悉心籌議，將通省漕務，通盤核算，刊示曉諭。所有道府漕規，及上下各衙門一切房費差費，概行革除。所以清弊之源也。其州縣徵收漕米，現在運河未通，不能兌運，改收折色，按其向年浮收之數，痛加刪減，有較前減半者，有減過半，并減去三四倍者，所有由單、串、票、樣、米、號、錢，一切浮費，概行禁革，所以杜弊之流也。臣猶慮各州縣陽奉陰違，不能切實刪減，密委知府承倅，分赴各屬，宣布民間，務使周知。密查州縣，是否照辦。去後隨訪，聞署荊門直隸州革職留任知州方，向年該州漕米，每石收錢六千八百文，尙有由單、腳步、印、紅、樣、米、串、票、等費，統計每石，浮收錢八九千文不等。此次新章，每石減為制錢四千八百文，耗米、水

腳、串、票、雜費，一併在內。該署州於每石定價之外，任聽糧差，勒收由單、串、票、等錢。大戶每票，勒收錢一千文二千文。小戶每票，勒收錢五六百文不等。以致花戶，遵照新章，輸將踴躍者，俱觀望不前。臣查一州之大，不下數萬戶。若每戶勒收錢數百文數千文，通計即浮收數萬串不等。膽大妄為，莫此為甚。又荊門州歷年陳欠錢漕，甫經該管道毛鴻賓履勘稟緩，尙未核定，批准。該署州於開徵時出示，有歷年陳欠，照舊輸將之語，並將新漕印作陳欠。有楊姓一戶，欠完咸豐五年六年糧米三斗七升。糧書劉學文，勒將本年所完漕米，折價印作陳欠，浮收錢九千四百一十八文。查陳欠錢漕，既經該管道稟請展緩，該署州何得私收，並將新漕折作陳欠，是其私收陳欠，既不稟明帶徵，又復照舊浮收，勢必以所收之陳欠充私囊，而以託名之新欠，抵批解。居心尤屬巧詐貪鄙。臣查湖北錢漕積弊，自道光二十年後，歲額徵不及半。江陵監利等縣，則自道光二十年後，額徵不及二分。而浮收之數，則每石竟至二十餘千。州縣書差，恣意中飽，日甚一日。幾於不可收拾。現當整頓漕弊，嚴杜杜拉之際，若不從重懲辦，何以除積弊而挽頹風。據藩司馬秀儒、臬司羅遵殿、署糧道張曜、孫暨該管道毛鴻賓會詳揭參前來，與臣訪聞無異。查方先因另案革職留任，相應請旨將署荊門直隸州革職留任知州方革任提審，由臣發交藩臬兩司，提同書役人等，嚴訊確實，是否故縱書差，需索舞弊，抑係授意營私，貪婪不職，按律定擬。一面委員前往摘印接署，並查明任內倉庫正

雜各項，有無虧挪，另行辦理外，所有署荆門州革職留任知州方縱容糧差浮收，並私將新漕叩作陳欠，請旨革任提審各緣由，理合會同督臣官文據實臚陳，恭摺具奏。

上諭胡林翼奏參知州縱差浮收漕糧，請革任提審一摺，實屬膽大妄爲，居心貪鄙。方著卽革任，交胡林翼提同書役人等，嚴訊確情，按律懲辦，以肅漕政，而儆官邪。欽此。（十二月二十三日接奉）

再臣於十月十四日，將湖北漕務積弊已久，現擬革除冗費，減定漕章情形，密摺奏奉硃批，所奏實屬剴切，汝能不顧情面，祛百年之積弊，甚爲可嘉。俟辦有端倪，再行具奏。欽此。欽遵與司道武漢兩府日夜籌商，令各州縣將向來浮收數目及漕規冗費，據實開陳，痛加刪減。從前每石浮收錢十六七千，十八九千，或二十餘千者，今減至六千數百文，或五六千文。浮收八九千文者，今減至四五千文。耗米水脚票費，一併在內。其由單，串票，樣米，號錢，及雜項名目，一概革除。統計有漕州縣民間共刪減錢一百四十餘萬千文。此向來官吏丁差，剝之於民，而今還之於民者也。州縣照減定章程徵收後，北漕每石解正銀一兩三錢，耗銀一錢三分。南米每石解正銀一兩五錢，耗銀一錢五分。其較北漕多解銀二錢者，緣南米係供滿綠各營兵食，遇有災緩不敷，由藩庫籌款撥補。今藩庫款項支絀，不能不就款預籌。統計北漕南米，正耗銀兩，實應解糧庫銀四十一萬餘兩。此向來以熟捏荒，以徵爲欠，不盡歸

公，而今實歸於公者也。南米例支滿綠各營兵糧，應均照例價，每石折銀七錢，尙餘銀八錢。荊州滿營生計尤艱，應於每年例放二百日本色之內，酌加銀二錢，每石折銀九錢，尙餘銀六錢，計共餘銀八萬餘兩，撥入藩庫籌備撥補兵米，及滿綠各營正餉。又漕南水脚銀，每石一錢五分。計共銀四萬餘兩，向係各州縣開銷修倉鋪墊水陸腳價，及漕南書吏飯食等項之用，頗爲浮冒。今改徵折色，各州縣毋庸開銷。應飭全解糧庫，亦可補苴兵餉。此則於節省之中，寓籌備之意，於民無損，而於公有益者也。從前兌運北漕糧船，旗丁水手，於屯運例款不敷之外，州縣尙有津貼，名爲免費。今若一併裁革，將來河運疏通，勢必有礙兌運。擬將此項免費，暫提充餉。俟開兌北漕，仍歸丁船津貼。約計提銀七萬餘兩，此則因其所固有，留其所不可無，於目前有益，而於日後無損者也。又隨漕淺船，軍三安家，幫津，資役等款，改折停運，俱無庸開支。又可提存銀十二萬餘兩。凡此漕務情形，經臣通盤籌算，極力減除，爲民間省去錢一百四十餘萬串，爲國帑實得銀四十餘萬兩。又得節省提存銀三十餘萬兩，以今視昔，漕務利弊，較然可觀。至於州縣書差，僅徵飯食辛工紙張原難責以枵腹從公，然又何至如前此之十倍百倍，漫無限制。即現在收數，既已痛加刪減，而道府漕規，及上下衙門一切冗費，又復悉行革除。計州縣尙可稍資辦公，斷不至藉口賠累，別開浮勒詐索之端。臣既已訪察積弊，去其太甚，取一百餘萬之中飽，以分益乎上下。已往之愆，尙可不究，後來之弊

法必從嚴。萬一不肖州縣，託名冗費，恣意浮收，必應從重懲辦，以厲其餘。此則目前之整飭非難，而日久之防閑，尤所宜慎者也。現自減定章程之後，通省周知，小民踴躍，歡呼輸將，恐後歷年漕務開徵，至次年七月，猶事追比，甚至一二年後，尙煩催促。本年漕務經此整飭，因民所欲，必能提前數月，按數催解，藉以上紓聖慮。除州縣之陽奉陰違，仍前浮收者，另摺查參，並俟辦有成效，再行奏聞。所有辦理漕務大概情形，謹附片據實密奏。

特參抽取漢川縣釐金知縣疏

十二月初六日

竊查湖北自軍興以來，支用浩繁，遵奉奏準章程，抽釐助餉，自應嚴禁官吏之中飽，以資軍國之大計。前因代理漢川縣事候補縣丞曹福增，私設釐金小局四十七處，經臣於上年甄別案內奏參，奉旨革職在案。接任之員，宜如何涉己自愛，力濟時艱。詎署漢川縣知縣張到任半年，僅據報解北岸大營，并武昌總糧臺三千七百七十七千零五十文。查漢川爲襄河往來要道，商賈絡繹，訪聞該縣各卡，每月可收釐金錢六七千串，乃半年之久，僅解三千七百餘串。霄壤懸殊，顯有欺飾。當將張撤任。札飭該管漢陽府知府如山澈底清查詳報去後，嗣據如山呈到清摺，內開據張稟稱，自咸豐六年十月十一日到任起，至七年四月初七日撤任止，計六箇月，共收釐金錢二萬五千二百串，又稱解過錢七千三百

串。查張僅解釐金錢三千七百七十七串零，其餘解交何處？有無迴照？應飭稟明。又稱奉文撥給團練局錢四千二百串，係奉何處明文？發交何人承領？已屬冒濫。又稱開支釐金局經費錢四千八百串。查張任事半年，解數僅三千七百串，何以開支局費，至四千八百串之多，尤爲捏飾。又稱支應兵勇口糧錢三千一百餘串。是否奉文應付？亦未造冊稟報。又稱奉文撥給管理浮橋哲守備錢四百串，係奉何處明文？擬難準銷。又稱被李光榮游勇，劫去錢七百串。又稱學獲孝感縣匪徒，賞錢三百串。均屬無據之詞，例不準銷之款。又張自認挪用錢四千三百餘串。撤任後，僅據繳呈糧臺總局錢二千串，其餘延不呈繳。臣查張撤任後，經臣遴委官紳，前往漢川縣抽釐，檄令徑解糧臺司道彈收，並冊報督撫衙門，并總局查考。不準再經州縣書差之手。計自四月十五日起，至十月止，共報解糧臺總局錢七萬餘串，銀五千六百餘兩。歷時未及八月，約計得釐金八萬餘串。較之張經手六箇月，僅收錢二萬五千串者，已不止三倍之數。是其不實不盡，已可概見。况張於二萬五千串之內，僅止批解三千七百餘串。迨經撤任查追，又僅補繳二千串。是其任意開報，殊昧公爾忘私之義。據藩臬兩司轉據該管道府揭參前來。相應請旨，將前署漢川縣事揀發知縣張，即行革職，以便調查帳據。提同經手人等澈底訊明。是侵是挪，照數追繳。究辦。仍查明任內倉庫各款，有無虧挪情弊，另行辦理。外，所有署漢川縣張經手釐金，延不批解緣由，謹會同總督臣王文韶摺具奏。

上諭胡林翼奏參抽取釐金，延不批解之知縣，請旨革追一摺。張著即革職，交胡林翼提同經手人等，澈底訊明，照數追繳，按律懲辦，以儆官邪。欽此。（十二月二十三日接奉）

勘明各州縣衛被淹情形，乞分別緩

徵疏

十二月十五日

竊查錢漕之弊，在於捏報災荒。捏報之弊，由於查勘不實。湖北武昌漢陽安陸德安荊州荊門各府屬州縣濱臨大江，襄河以上，鍾隄潰口未修，每遇夏秋水漲，低窪田地，不無被淹。州縣顧惜考成，惟恐錢糧徵不足數，每捏報災荒，藉緩徵以寬免處分。甚至名雖請緩，實則私徵，侵蝕騰挪，任意顛倒，積習相沿，幾於牢不可破。本年各州縣稟報被淹，臣等督同司道，特定章程，責成該管道府親詣確勘，原稟稍有捏飾，立時更正。由道府加結詳報，仍由臣等核駁覆勘。有一州一縣，駁至三四次，五六次，甚至七八次者，不憚煩瑣。務使所報區畝，界限分明，被淹情形，輕重確實。臣又密委賢員，分往各屬逐處查勘，訪問土人，以期辦理核實。一洗從前積習，庶於國計民生，均有裨益。茲據該管道府節次詳晰更正，較原稟請緩數目，有由重改輕者，有刪減一半，及減過半者，有全行刪減者。臣等悉心覆核，參以訪問，似不至再有虛捏。所有前據嘉魚漢陽漢川黃陂孝感沔陽鍾祥京山潛江天門雲夢應城江陵公安石首監利松滋枝江，並荊門等州縣，或因江水泛漲，或因襄水

陡發，或係頻年積淹，陸續稟報，均經疊次嚴駁。由該管道府周歷被淹地方，及屯坐各屬軍屯田畝，勘明輕重實在情形。除原稟照常徵收，並涸復及更正之處，仍即催徵外，實勘得嘉魚縣廣賢淨居左湖，宣化清洪受澇，豐義上懷等八里，共三十七甲，並上洲中洲傅洲，傍洲護洲，還洲小洲上截洲，下截洲等九洲內，越塘等二十八處，上屯中屯傅屯田屯白屯大屯小屯東屯牛屯等九屯內，斗塘等二十三處，本年入夏以後，江河水漲被淹，秋成失望，情形次重。漢陽縣菱角湖等八里，夏秋水盛漲，田禾被淹，涸復不能補種，情形次重。漢川縣喝城等三十二垸，因上游鍾祥縣獅子口潰口未築，水勢下注，常年淹灌，情形較重。又南湖上官等二十一垸，亦被帶淹，收成歉薄，情形較輕。黃陂縣淤洲等六社，地勢低窪，通江臨湖，本年夏秋水倒灌被淹，情形較重。大嘴等二百二十三社，雖係被淹，涸出較早，尚可補種，情形較輕。孝感縣尚文等十九會，地勢低窪，田禾淹沒，不能補種，情形次重。仁壽等一百八十三會，略有補種，情形較輕。沔陽州梅公等七十二垸，濱臨通城銅城各湖，地勢最低，閒有涸出，情形次重。金馬等三百二十九垸，涸出較早，尚可補種，情形較輕。鍾祥縣楊林等三村莊，龍山觀等八十村莊，隄工潰口後，已成積淹，情形次重。桃園等二村莊，孫家集等十一村莊，被淹後稍有補種，情形較輕。京山縣高集等三十七團，地勢最低，自鍾祥縣隄潰未築，歷年被淹，節候已遲，難期補種，情形次重。又聶家灘等二十五團，並各流等二十七團，水退

較早，補種雜糧，情形較輕。潛江縣文葱等十二垸，地勢低窪，夏秋雨水過多，涸出太遲，不能補種。情形次重。泥伏崔家等六十六垸，涸後稍早，情形較輕。天門縣關廟等一百一十一垸，濱臨河岸，頻年鍾祥潰口漫淹，本年又復淹灌，情形較重。魯巷等十五垸，亦係積淹，間有涸出，稍資補種，情形次重。雲夢縣永保等六會，地勢低窪，因府河水漲漫淹，不能補種，情形較重。又彭家等三會，地勢稍高，水退補種，情形較輕。應城縣葉嘴等九團，地勢低窪，獅子潰口之水，建飯而下，不能疏消補種，情形較重。樸林等十一團，夏汛水淹，涸復後稍資補種，情形較輕。江陵縣虎渡汛麻家等三十四垸，西支隄漫潰未修，水衝沙壓，情形較重。李家埠等九十垸，亦係積淹，稍有涸復，情形次重。田家等四十六垸，涸復補種，情形較輕。公安縣毛一等四里及西一等十里內，三十七甲，地勢低窪。夏秋江水漫淹，情形較重。板半等六里及西一等十里內，十三甲，涸復後稍資補種，情形較輕。石首縣民旺等十七坊垸，同一都等十四坊垸內，三十五甲，因逼近馬林工潰口，夏秋間江水灌淹，涸後已遲，情形較重。梅驛垸及一都等坊垸內，二十一甲，前雖漫淹，早經涸出，補種雜糧菜蔬，尚獲有收，情形較輕。監利縣崇林等三十七垸，係頻年淹潰之區，車林等六十二垸，地勢極低，水由河屬洪湖，倒灌漫淹，耕穫失時，情形較重。南雷洲等一百七十二垸，涸復尚早，得資補種，情形較輕。松滋縣中二等都內，二十八甲，及下二等三都，地勢低窪。夏秋間水由江陵西支三節工潰口灌入，不能疏涸，

情形較重。中二等都內二十二甲，及上五等四都被淹後，稍資補種，情形較輕。枝江縣利淳等六洲，悉濱江岸，地勢低窪。夏秋水淹，不能補種，情形次重。福星等十二洲垸，地勢稍高，涸後補種，情形較輕。荊門州游家湖等二十九區，緊依湖港，地勢低窪，本年夏汛江水漲發，補種已遲，情形次重。馬上三等十三圖，涸後，略有補種，情形較輕。以上各州縣民田，並屯坐各衛軍田，情形均屬相同。賴本年麥收尚稔，或補種雜糧，或捕魚爲業，得贍生計，勘不成災。所有應納成豐七年銀米，隄閘河費，蘆課，閒丁和餉，並應帶徵六年銀米等款，請分別緩徵遞緩，以紓民力。開列垸區村莊名摺，由藩司馬秀儒署糧道張曜孫議詳請奏前來。臣等伏查州縣如遇水旱災傷，例應勘明分數，分別展緩。本年湖北各州縣被淹田地，業經臣等核駁覆勘，疊次更正。雖均勘不成災，然皆耕穫失時，收成歉薄，自應分別緩徵遞緩，以廣皇仁而蘇民困。除本年漕糧，另摺請旨外，合無仰懇天恩俯準，將被淹較重之漢川縣喝城等三十二垸，黃陂縣淤洲等六社，天門縣關廟等一百一十一垸，雲夢縣永保等六會，應城縣葉嘴等九團，江陵縣虎渡汛麻家等三十四垸，公安縣毛一等四里及西一等十里內，三十七甲，石首縣民旺等十七坊垸，同一都等十四坊垸內，三十五甲，監利縣崇林等三十七垸，車林等六十二垸，松滋縣中二等都內二十八甲，及下二等三都，各應徵新賦錢糧，南米隄閘，河費，閒丁，和餉等項，一併緩至來年秋後，限一年帶徵。其原緩六年銀米等項，緩至九年

秋後帶徵。又被淹次重之嘉魚縣廣賢等八里，共三十七甲。並上洲等九洲內越塘等二十八處。上屯等九屯內斗塘等二十三處。漢陽縣菱角湖等八里。沅陽州梅公等七十二垸。孝感縣尙文等十九會。鍾祥縣楊林等三村莊。龍山觀等八十村莊。京山縣高集等三十七團。潛江縣文葱等十二垸。天門縣魯巷等十五垸。江陵縣李家埠等九十垸。枝江縣瀾浮等六洲。荊門州游家湖等二十九垸。各應徵本年南米，照常徵收。請將本年新賦銀兩，緩至來年秋後，限一年帶徵。其原緩六年銀米等項，緩至九年秋後帶徵。又被淹較輕之漢川縣南湖上官等二十一垸。黃陂縣大嘴等二百二十三社。孝感縣仁壽等一百八十三會。沔陽州金馬等三百二十九垸。鍾祥縣桃園等三村莊。孫家集等十一村莊。京山縣黃家灘等二十五團。並各流等二十七團。潛江縣泥伏崔家等六十六垸。雲夢縣彭家等三會。應城縣樸林等十一團。江陵縣田家等四十六垸。公安縣板半等六里。及西一等十里內十三甲。石首縣梅肇垸及一都等坊垸內二十一甲。監利縣南雷洲等一百七十二垸。松滋縣中二等都內二十二甲。及上五等四都。枝江縣福星等十二洲垸。荊門州馬上三等十三團。各應徵本年錢糧南米等項，照常徵收。其原緩六年銀米等項，緩至來年秋後帶徵。以紓民力。其武昌等衛被淹屯田，應緩銀兩，均照屯坐各州縣，一律辦理。又德安府屬之雲夢應城二縣上年專案奏明上忙地丁錢糧除已徵外，其餘未徵銀兩，一律緩至七年秋後帶徵。荷蒙俞允在案。

本年被淹地方，如在上年奏準緩徵內者，除本年聲明徵新緩舊，照案辦理，並上年緩徵地畝內，有本年被淹，請緩新賦者，舊欠照例遞緩外，其餘一律飭令照常帶徵。此外本年請緩各屬，所有五年以前原請遞緩帶徵者，仍照奏案，歸於善後案內，分別辦理。至六年奏明成災之處，分限兩年帶徵者，均以次遞緩。又黃州府屬之黃岡廣濟黃梅蘄州蘄水等州縣，夏間皖匪上犯，有無被擾被淹較重之處，現在另行飭查，分別辦理。又江夏漢陽二縣，應請豁免楚課門攤錢糧，因係被擾情形，未便彙入被淹案內，另行附片陳奏。除飭取各屬垸區地名，應緩銀米，照例咨明辦理外，所有勸明各州縣衛民屯田地，被淹歉收各處，輕重情形，分別緩徵錢糧南米等項緣由，理合恭摺具奏。

再本年各州縣衛被淹田地，應完錢糧漕米，業經臣等分別輕重情形，另摺奏明請緩。在江夏縣，每年額徵楚課銀四千一百九兩有零。漢陽縣，每年額徵居仁由義循禮等坊，並鵬公口上屯門攤地課等錢糧銀一千三百六十餘兩。該二縣係附郡首邑，迭遭兵燹，居民遷徙流離，房屋被燬，現雖漸次歸徠，慮舍無力修葺，多係搭蓋蕪棚棲止，地基空曠。城外復經官兵開挖濠溝，困苦情形，實堪憫惻。據署江夏縣知縣艾鴻美，署漢陽縣知縣吳瑛稟，經該管道府查勘屬實，請將本年江夏縣應徵楚課，在於被擾尤甚之崇通及近城之稍水等屯，房基銀內，豁免十分之一，銀四百兩。又請將本年漢陽縣應徵門攤地課錢糧，於被擾尤甚之居仁由

義崇信等坊，門攤銀一百三十五兩七錢九分九釐，地課銀六百一十一兩一錢一分，一併豁免。餘仍照常徵收。由布政司馬秀儒具詳請奏。前來臣等覆查粵匪竄擾湖北，武昌三陷，漢陽四陷，蹂躪更甚於他處。現在居民房屋，無力修葺。瓦礫荆榛，地甚空曠，并有開挖濠溝處所，民間困苦情形，皆臣等所目擊。合無仰懇天恩，準將江夏縣應徵咸豐七年楚課，在於崇通稍水等屯內豁免銀四百兩。漢陽縣居仁由義崇信等坊，應徵咸豐七年門攤地課錢糧銀七百四十六兩九錢九釐，一併豁免。以廣皇仁而紓民力。餘仍照常徵收。除飭開具花名細數，並取具印結存卷外，所有陳請豁免江夏漢陽二縣楚課門攤地課錢糧各緣由，謹附片具奏。

上諭官文胡林翼奏，勘明各州縣衛民屯田地，被淹懇恩分別緩徵錢糧南米一摺。另片奏請豁免江夏漢陽二縣楚課門攤地課錢糧等語。該督撫卽刊刻謄黃，徧行曉諭，務使實惠及民，毋任吏胥舞弊，用副朕軫念災區至意。餘著照所議辦理。該部知道。欽此。

勘明各州縣被淹田地，請分別緩徵

疏 十二月十五日

竊照道光二十七年，準戶部咨嗣後蠲緩漕糧，於地丁摺外，另行具摺，候旨遵辦等因。在案。查湖北漢陽安陸德安荊州等府屬州縣，濱臨大江，襄河以上，鍾隄潰口未修，每遇夏秋水漲，低窪

田地，不無淹灌。例準緩徵糧賦，遞緩帶徵。州縣勒折浮收，猶慮徵不足數。每每捏災枉緩，希圖寬免處分。甚至藉緩私徵，侵蝕騰挪，任意顛倒，積習相沿，牢不可破。以致正供日虧，民生益困。本年臣等於各屬稟報被淹，督同司道，特定章程，責成該管道府，親詣確勘。原稟稍有捏飾，立時更正。由道府加結詳報，仍由臣等核駁覆勘。有駁至三四次，五六次，甚至七八次者，復又密委賢員，分往各屬，逐處查勘，訪問土人，以期核實。一洗從前積習，庶於國計民生，均有裨益。茲據該管道府，節次詳晰更正，有較原稟請緩數目，刪減一半者，有減過半者，有全行刪減者。臣等悉心覆核，參以訪問，似不致再有虛捏。所有前據黃陂天門雲夢應城江陵公安石首監利松滋等州縣，或因江水泛漲，或因襄水陡發，或係頻年積淹，陸續稟報，均經迭次駁駁。由該管道府周歷被淹地方，勘明輕重實在情形。除原稟照常徵收，並涸復及更正之處，仍卽催徵外，實勘得黃陂縣淤洲等六社，地勢低窪，通江臨湖。本年夏秋水漲，倒灌被淹，情形較重。天門縣關廟等一百一十一垸，濱臨河岸，頻年鍾祥潰口漫淹。本年又復迭淹，情形較重。雲夢縣永保等六會，地勢低窪。因府河水漲，漫淹不能補種，情形較重。應城縣葉嘴等九團，地勢低窪。獅子潰口之水，建瓴而下，不能疏消，情形較重。江陵縣虎渡汛麻家等三十四垸，因西支隄漫潰未修，水衝沙壓，情形較重。公安縣毛一等四里，及西一等里內三十七甲，地勢低窪。夏秋水漫被淹，情形較重。石首縣民旺等十七垸，同一都等十四坊